

# Kerja naik taraf Terminal Kapal Persiaran Swettenham Pier (SPCT) mula bulan depan



Oleh Siti Sofia Md Nasir

[siti.sofia@bh.com.my](mailto:siti.sofia@bh.com.my)

GEORGETOWN: Kementerian Kewangan mengumumkan kerja menaik taraf Terminal Kapal Persiaran Swettenham Pier (SPCT) di sini, akan bermula awal bulan depan.

Menterinya, Lim Guan Eng, berkata kerja naik taraf membabitkan empat fasa dengan kos RM500 juta itu adalah kerjasama antara Pelabuhan Pulau Pinang Sdn Bhd (PBSB) dan pelaburan swasta.

Beliau berkata, pelan pembangunan sehingga 2025 itu akan memperluaskan pangkalan sedia ada sehingga 400 meter, bagi membolehkan dua kapal pelayaran mega datang pada masa sama.

“Ketika ini, sektor pelancongan pelayaran kita naik ke tangga ketiga di Asia, yang mana pelabuhan Georgetown menjadi pilihan utama dengan 152,000 pengunjung direkodkan pada tahun lalu.

“Bagi memastikan ia terus berkembang, kita perlu memastikan infrastruktur sentiasa dalam keadaan terbaik bagi menerima lebih ramai pelancong dalam sektor pelayaran,” katanya pada sidang media di sini, hari ini.

Terdahulu, Guan Eng melakukan lawatan kerja ke PBSB dan melihat operasi SPCT secara dekat, selain turut beramah mesra dengan pelancong.

Difahamkan, projek naik taraf di kawasan seluas 2.83 hektar itu akan membolehkan SPCT menerima kehadiran pengunjung sehingga tiga juta orang setahun.

Guan Eng berkata, SPCT juga bakal dilengkapi dua kedai bebas cukai, berbanding satu kedai ketika ini.

Katanya, pelaksanaan tambahan kedai bebas cukai itu susulan pengumumannya pada pembentangan Belanjawan 2019, pada 2018 lalu.

“Bagaimanapun, saya difahamkan pihak PBSB sedang dalam proses menerima lesen daripada kastam,” katanya.



Guan Eng ketika membuat lawatan rasmi ke Terminal Kapal Persiaran Swettenham Pier (SPCT), di Georgetown.  
- NSTP/Danial Saad

<https://www.bharian.com.my/berita/nasional/2020/01/645833/kerja-naik-araf-terminal-kapal-persiaran-swettenham-pier-spct-mula>